

朔方備乘

朔方備乘卷第三十三

傳三

遼金元北徼諸國傳敘

轄戛斯

乃蠻

克烈

斡羅思

欽察

康里

阿速

吉利吉思

昂可剌

烏斯

撼合納

謙州

益蘭州

報達

附載

臣秋濤謹案遼金二史於外國僅載高麗西夏

二傳餘皆闕之其時東南西三方之國有通使
於宋者尙可以宋史參考至北陲則惟與遼金
相接二史俄空殊屬疏漏今考遼之北陲接壤
於轄戛斯乃蠻金之北陲有克烈部皆今俄羅
斯境臣秋濤詳考羣書補輯成傳至奇渥溫氏
西北拓境極廣今俄羅斯東西二土咸入版圖
乃元史亦概從闕略殊不可解臣秋濤亦爲補
苴以便觀覽若報達卽波斯今其北境亦入羅
刹爰附著之其他西域印度諸國事與北徼無

涉則不具錄云

轄戛斯傳

臣秋濤謹案轄戛斯全境皆今俄羅斯地

轄戛斯卽黜戛斯在遼時爲北陲大國遼史未立傳故其事首尾不著

臣

秋濤謹考諸書詮次

如左按黜戛斯古堅昆國也地當伊吾之西焉

耆之北

臣秋濤謹案焉耆卽今喀喇沙爾其北曰葛邏祿卽今塔爾巴哈台又北始爲

黜戛斯地唐境止及焉耆故唐書云然

白山之旁或曰居勿或曰

結骨其種雜丁零乃匈奴西鄙也匈奴封漢降將李陵爲右賢王衛律爲丁零王後郅支單于

破堅昆其地東距單于廷七千里南至車師五千里鄯支留都之後世得其地者訛爲結骨又號紇骨亦曰紇圻斯云其人皆長大赤髮皙面綠瞳以黑髮爲不祥黑瞳者必曰陵苗裔也結骨東有木馬突厥三部落曰都播彌列哥餓支其酋長皆爲頡斤樺皮覆室多善馬俗乘木馬馳冰上以板藉足屈木支腋蹴輒百步勢迅激夜鈔盜晝伏匿結骨之人得以役屬之結骨本強國也地與突厥等突厥以女妻其酋豪突厥

敗始隸薛延陀延陀以頡利發一人監國其酋
長三人曰訖悉輩曰居沙波輩曰阿米輩共治
其國未始與中國通貢貞觀二十二年聞鐵勒
等已入臣卽遣使者獻方物其酋長俟利發失
鉢屈阿棧身入朝太宗勞享之謂羣臣曰往渭
橋斬三突厥自謂功多今俟利發在席更覺過
之俟利發酒酣奏願得持笏帝以其地爲堅昆
府拜俟利發左屯衛大將軍卽爲都督隸燕然
都護高宗世再來朝景龍中獻方物中宗引使

者勞之曰而國與我同宗非它蕃比屬以酒使
者頓首元宗世四朝獻乾元中爲回紇所破自
是屬於回紇不能通中國後語訛爲黠戛斯蓋
回紇謂之若曰黃赤面云又訛爲戛戛斯衆數
十萬勝兵八萬直回紇西北三千里南依貪漫
山地夏沮洳冬積雪男少女多以環貫耳俗趨
伉男子有勇黥其手女已嫁黥項雜居多淫佚
以十二物紀年如歲在寅則曰虎年氣多寒雖
大河亦半冰稼有禾粟大小麥青稞步磴以爲

麴糜稌以三月種九月穫以飯以釀酒而無果
蔬畜馬至壯大以善鬪者爲頭馬有橐它牛羊
牛爲多富農至數千其獸有野馬骨咄黃羊羆
羝鹿黑尾黑尾者似麋尾大而黑魚有蔑者長
七八尺莫痕者無骨口出頤下鳥雁鷺烏鵲鷹
隼木松樺榆柳蒲松高者仰射不能及顛而樺
尤多有金鐵錫每雨俗必得鐵號迦沙爲兵絕
犀利常以輪突厥其戰有弓矢旗幟其騎士析
木爲盾蔽股足又以圓盾傳肩可捍矢刃其君

曰阿熱遂姓阿熱氏建一纛下皆尙赤餘以部落爲之號服貴貂貂阿熱冬帽貂夏帽金釵銳頂而卷末諸下皆帽白氊喜佩刀礪賤者衣皮不帽女衣毳氍錦罽綾蓋安西北庭大食所貿售也阿熱駐牙青山周柵代坦聯氊爲帳號密的支它首領居小帳凡調兵諸部役屬者悉行內貂鼠青鼠爲賦其官有宰相都督職使長史將軍達干六等宰相七都督三職使十皆典兵長史十五將軍達干無定數諸部食肉及馬酪

唯阿熱設餅餌樂有笛鼓笙箏篳盤鈴戲有弄
駝獅子馬伎繩伎祠神爲主水草祭無時呼巫
爲甘昏嫁納羊馬以聘富者或百千計喪不殮
面三環尸哭乃火之收其骨歲而爲墓然後哭
泣有節冬處室木皮爲覆其文字言語與回鶻
正同法最嚴臨陣撓奉使不稱妄議國若盜者
皆斷首子爲盜以首著父頸非死不脫阿熱牙
至回鶻牙所橐它四十日行使者道出天德右
二百里許抵西受降城北二百里許至鷓鴣泉

泉西北至回鶻牙千五百里許而有東西二道
泉之北東道也回鶻牙北六百里得仙娥河河
東北曰雪山地多水草青山之東有水曰劔河
偶艇以度水悉東北流經黠戛斯合而北入於

海

臣秋濤謹案仙娥河卽今色楞格河劔河在其西當卽今克穆河也

黠戛斯幅

輿甚廣自突厥破滅安西北庭淪陷後其國東
與骨利幹西南與葛邏祿大食南與吐蕃相接
而東南受役屬於回鶻然常與大食吐蕃葛邏
祿相依杖吐蕃之往來者畏回鶻剽鈔必住葛

邏祿以待黠戛斯護送大食有重錦其載二十
橐它乃勝旣不可兼負故裁爲二十四匹每三歲
一餉黠戛斯而回鶻授其君長阿熱官爲毗伽
頓頡斤回鶻稍衰阿熱卽自稱可汗其母突騎
施女也爲母可敦妻葛祿葉護女爲可敦回鶻
遣宰相伐之不勝拏鬪二十年不解阿熱恃勝
乃肆詈曰爾運盡矣我將收爾金帳於爾帳前
馳我馬植我旗爾能抗亟來卽不能當疾去回
鶻不能討其將句錄莫賀導阿熱破殺回鶻可

汗諸特勒皆潰阿熱身自將焚其牙及公主所
廬金帳者回鶻可汗常坐也乃悉收其寶貲并
得太和公主遂徙牙牢山之南牢山亦曰賭滿
距回鶻舊牙度馬行十五日阿熱以公主唐貴
女遣使者衛送公主還朝爲回鶻烏介可汗邀
取之并殺使者會昌中阿熱以使者見殺無以
通於朝復遣注吾合素上書言狀注吾其姓也
合言猛素者左也謂武猛善左射者行三歲至
京師武宗大悅班渤海使者上以其處窮遠能

修職貢命太僕卿趙蕃持節臨慰其國詔宰相
卽鴻臚寺見使者使譯官考山川國風宰相李
德裕上言宜法貞觀故事爲王會圖以示後世
有詔以鴻臚所得績著之又詔阿熱著宗正屬
籍是時烏介可汗餘衆託黑車子阿熱願乘秋
馬肥擊取之表天子請師帝令給事中劉濛爲
巡邊使朝廷亦以河隴四鎮十八州久淪戎狄
幸回鶻破弱吐蕃亂相殘齧可乘其衰乃以右
散騎常侍李拭使黠戛斯冊君長爲宗英雄武

誠明可汗未行而或謂黠戛斯小種不足與唐
抗詔百官集議皆曰回鶻盛時有冊號今幸衰
又加黠戛斯後且生患乃止至大中元年竟詔
鴻臚卿李業持節冊黠戛斯爲英武誠明可汗
逮咸通間三來朝然卒不能取回鶻其後無聞
遼時稱轄戛斯爲北陞大國太宗六年正月轄
戛斯國慕化來貢穆宗應歷二年十月回鶻及
轄戛斯皆來貢景宗保甯八年十二月轄戛斯
國遣使來貢金時不復著見或曰元初吉利吉

思卽其裔或曰蓋西徙爲幹羅思云

乃蠻部傳

乃蠻部遼時始著耶律大石西奔由乃蠻抵畏
吾兒卽此部也其部初居於今俄羅斯境古謙
河之旁後益強盛拓地至烏隴古河東與克烈
部南與西遼接待其兵力雄長漠北其酋曰卜
魯欲可汗是時克烈部王罕脫里之弟苦其兄
殘暴來奔卜魯欲可汗爲發兵攻脫里盡奪其
衆脫里走遇元太祖振給之始復盛旣而太祖

與脫里合兵攻卜魯欲可汗卜魯欲可汗出不
意襲脫里於土兀刺河大勝之以太祖救得解
及太祖旣滅克烈時乃蠻卜魯欲可汗已卒太
陽可汗嗣立心思太祖遣使謀於白達達部主
阿刺忽思曰近聞東方有稱帝者天無二日民
豈有二王邪君能益吾右翼吾將奪其弧矢也
阿刺忽思執其使來告太祖與約同攻乃蠻歲
甲子大會於帖麥該川羣臣以方春馬瘦爲言
太祖弟幹赤斤曰事所當爲斷之在早乃蠻欲

奪我弧矢是小我也彼恃其强大吾攻其不備
可克也帝悅遂進兵太陽可汗合諸部兵來拒
兵於沆海山欲誘帝深入然後戰而擒之其將
火力速八赤曰先王戰伐勇進不回馬尾人背
不使敵見今爲遷延計得非怯乎太陽可汗怒
卽躍馬索戰時札木合部長將援乃蠻見帝軍
整懼而先遁帝與乃蠻軍大戰至晡禽殺太陽
可汗諸部軍皆潰太陽可汗子屈出律率餘衆
遁至塔米爾河太祖兵追及復走阿勒台山先

是蒙古居烏桓之北與乃蠻同鵠接壤世修貢
於遼金號微弱至是滅克烈降乃蠻兼收朶魯
班塔塔兒哈答吉散只兒四部駸駸乎稱雄矣
元年丙寅十二月太祖大會諸部長建九旂白
旗卽尊位於斡難河之源羣臣共上尊號曰成
吉斯可汗實宋寧宗開禧二年金宣宗泰和六
年也帝旣卽位復發兵征乃蠻時屈出律與蔑
里乞部長脫脫合兵於也兒的石河上太祖進
攻大敗之脫脫西奔欽察屈出律南奔西遼太

祖遂盡取乃蠻部之地既而西遼主直魯古出獵屈出律襲而奪其位尊直魯古爲太上皇太祖聞之復決計西伐蓋蒙古兵鋒及於西域滅國四十其端肇於乃蠻云

克烈部傳

克烈部金時始著其舊居在吉利吉思西南謙河之西唐麓嶺之北距大都九千里唐麓嶺蓋卽唐努山金爲烏梁海游牧距京師止四千餘里以地形里至計之克烈部舊居當在今俄羅

斯東境伊聶謝柏興以南也其部長名脫里者
南徙土刺河與元烈祖壤地相接烈祖諱也速
該卽元太祖之父也初脫里多戮辱兄弟其叔
父菊兒汗攻之脫里敗走以百餘騎奔烈祖烈
祖親將兵逐菊兒汗奪還其部衆脫里德之與
烈祖盟稱按答猶今云諳達也烈祖殂太祖尙
幼部落離散又爲蔑里乞部所攻虜夫人宏吉
刺氏太祖訴於脫里脫里念舊德與札木合連
兵救太祖襲蔑里乞破走之以烈祖舊衆歸太

祖太祖能撫其衆曰益強盛時塔塔兒部叛金
金遣丞相完顏襄率兵逐叛者太祖聞之使告
脫里同攻塔塔兒部太祖起兵自斡難河迎討
大破之於納刺禿失圖之野獲大珠金銀綳車
各一金主冊脫里爲王卽元太祖本紀所稱王
罕也封元太祖爲察兀忽魯猶言招討使也元
太祖由是兵力益強旣而脫里之弟叛歸乃蠻
乃蠻部長爲發兵伐克烈復奪脫里之衆脫里
遁走中道糧絕困乏甚太祖親迎撫勞之爲伐

蔑里乞部取其資財田禾遺之脫里見部衆稍
集遂不告於帝自率兵再攻蔑里乞大掠而還
於帝一無所遺帝不以屑意會乃蠻卜魯欲可

汗

臣秋濤謹案通鑑及親征記
皆作孟祿可汗以音相近也

方強帝復與脫

里合兵攻之時札木合起兵援乃蠻見乃蠻敗
欲帝與脫里有隙乃言於脫里曰我於君爲白
翎雀他人如鴻雁耳白雀寒暑常在北方鴻雁
遇寒則南飛就暖謂太祖心不可保也脫里聞
而惑焉於是太祖復與脫里征孟祿可汗至黑

辛八石之野敵遣也的脫不魯領百騎爲前鋒
我軍逼之走據高山其馬騎轉墜擒之及太祖
與乃蠻將遇於拜答刺邊只兒之野日暮列陣
對宿是夜脫里多燃火於所陣地示人不疑潛
移衆於哈薩兀里河太祖見脫里移去曰此輩
無乃異志乎亦解去駐撒里川脫里至土兀刺
河乃蠻乘其不備掠其部民輜重脫里命其子
亦刺合將兵追之且遣使來告曰乃蠻不道掠
我人民太子有四良將能假我雪恥乎太祖釋

前憾遂遣博兒朮木華黎博羅渾赤老溫四將
往救大敗其衆盡奪所掠還之脫里謝曰曩以
困乏來歸荷太子加意存撫今已亡之國又奪
之歸不知將何以報未幾太祖與脫里議昏不
成札木合復乘間謂脫里子亦剌合曰鐵木真
太子嘗通信乃蠻將不利於君父子君能加兵
我當陰爲助亦剌合數言於其父脫里信之歲
癸亥遂舉兵來侵方誓衆牧人乞失力夜馳告
太祖太祖止軍阿蘭塞急移輜重於失連真河

遣折里麥爲先鋒脫里亦領兵由忽刺河卜魯
哈二山來太祖移軍合闐只之野整兵出戰屢
敗之脫里子亦剌合來衝陣我軍射中其頰太
祖將兵四千六百騎分兩隊行駐軍董歌澤遣
使責脫里曰君爲菊兒所逐困迫來歸吾父卽
攻菊兒敗之於河西收其土地人民以與君其
功一也君爲乃蠻所攻西奔日沒處君弟札阿
紺卜在金境我亟遣人召還比至又爲蔑里乞
部人所逼我使兄弟往殺之其功二也君貪餒

無依我歷取各部羊馬資財盡以奉君其功三也君不告我往掠蔑里乞大獲而還未嘗纖毫分我及君爲乃蠻所傾我遣四將奪還爾人民重立爾國家其功四也我征朶魯班等五部如海東鷙禽之於鴻雁見無不獲獲則必致於君其功五也今乃易恩爲讐忍加兵於我哉遂整兵至班朱尼河河水方渾帝飲之以誓衆曰使我克定大業當與諸君同甘苦苟渝此言有如河水凡與飲者謂同飲渾河水時脫里勢强衆

頗危懼與戰於哈蘭真沙陀之地脫里敗走路
逢乃蠻部將爲所殺克烈部由是遂滅

幹羅思欽察康里傳

幹羅思欽察康里三國元時始著幹羅思卽烏
孫音轉今之俄羅斯也欽察在今俄羅斯北境
地近北海去大都三萬餘里康里在欽察之東
元太祖初征蔑里乞部其部長脫脫與乃蠻部
長屈出律合兵也兒的石河以拒太祖太祖進
攻破之脫脫西遁由康里部奔欽察太祖遣使

索之欽察部長亦納思不與太祖怒命速不台
率師伐之製鐵車以賜曰蔑里乞脫脫吾深仇
也今戰敗遠遁如馬帶竿如鹿負箭汝其追之
若飛汝作鷹鷂若入穴汝作鋤若入海汝作網
與汝鐵車所以堅汝志也速不台受命率精銳
三千人踰高山涉險阻抵欽察境亦納思已老
國中大亂其子舉族迎降至癸未年速不台復
請討欽察引兵繞寬田吉思海輾轉至太和嶺
鑿石開道出不意遇欽察酋長玉里吉及塔哈

爾方聚於布租河縱兵奮擊潰之遂收其境又
至阿里吉河與幹羅思部大小密赤思老遇一
戰降之略阿速部而還蓋自脫脫西奔而欽察
等諸國悉被兵矣其俗驍勇善戰元師退輒復
拒守太祖征西域時復命長子朮赤率哲伯曷
思麥里等分道征之以幹羅思等三部地封朮
赤太宗時又命朮赤子拔都及速不台等征之
時定宗憲宗皆在軍中至憲宗時又命諸王旭
烈兀由西域征兀林國下一百二十城兀林亦

即幹羅思也蓋累世用兵而後元之斥境極於
波羅的海矣康里亦作康鄰其子孫仕元多以
文學顯欽察降衆別爲軍討叛王海都等多得
其力云餘詳諸王及將帥傳

阿速傳

阿速元時撫有其地明史言其國近天方撒馬
兒罕幅員甚廣城倚山面川川南流入海有魚
鹽之利土宜耕牧俗敬佛畏神好施惡鬪物產
富寒暄適節人無饑寒夜鮮寇盜雅稱樂土

臣

秋壽謹案以今地形考之阿速卽俄羅斯南境之阿索富城也城北臨端河亦名敦河西濱黑海卽所云川南流入海者其海灣至今猶號阿速灣云南道通亞喇伯卽天方東道通尋思干卽撒馬兒罕方隅形勢約略可考徐松西域水道記曰元史每言阿速與欽察爲鄰疑阿速卽哈薩克又曰元史言欽察阿速諸國速不台傳與曷思麥里傳互異速不台傳云收欽察境又至阿里吉河與斡羅思部大小密赤思老遇一

戰降之略阿速部而還是先欽察而斡羅思而
阿速也曷思麥里傳云太祖命曷思麥里從哲
伯爲先鋒攻乃蠻克之斬其主曲出律帝親征
至薛迷思干追其主札刺丁至憇顏城西塞札
刺丁逃入於海取玉兒谷德痕兩城繼而憇顏
城亦下帝遣使趣哲伯疾馳以討欽察命曷思
麥里招諭曲兒忒失灣兒沙等城悉降至谷兒
只部及阿速部以兵拒敵皆戰敗之招降黑林
城進擊斡羅思於鐵兒山克之獲其國主密只

思臘

臣秋濤謹案密只思臘卽密赤思老也

哲伯命曷思麥里獻

諸朮赤太子誅之尋征康里至孛子八里城與其主霍脫恩罕戰又敗其軍進至欽察亦平之是曷思麥里由西域轉戰而北先阿速而幹羅思而康里而後欽察也然曷思麥里傳先言帝趣哲伯疾馳以討欽察則征欽察究在先曷思麥里徇西域諸城而北先至阿速則阿速在欽察之南阿速與哈薩克音亦相近也

臣

秋濤謹

案徐松論元祖用兵征欽察阿速先後次第引

證頗爲詳備惟以阿速爲卽哈薩克則尙沿舊說案哈薩克在裏海東北曷思麥里由西域征阿速部是時元兵已踰尋思干城而西曷思麥里必不更折而東繞出裏海之北也惟自布哈爾等國西行取道於裏海之西黑海之東以征俄羅斯則阿索富城正當孔道是阿速卽阿索富城無可疑者明乎此則幹羅思諸地疆域皆瞭如指掌矣

吉利吉思諸部傳

元置嶺北行省於和林和林之北有吉利吉思
昂可刺烏斯撼合納謙州益蘭州等處元時撫
有其地皆在今俄羅斯東境吉利吉思者初以
漢地女四十人與烏斯之男結婚取此義以名
其地南去大都萬有餘里相傳乃滿部始居此
及元析其民爲九千戶其境長一千四百里廣
半之謙河經其中西北流又西南有水曰阿浦
東北有水曰玉須皆巨浸也會於謙而注於昂
可刺河北入於海俗與諸國異其語言則與畏

吾同廬帳而居隨水草畜牧頗知田作遇雪則跨木馬逐獵土產名馬白黑海東青昂可刺者因水爲名附庸於吉利吉思去大都二萬五千餘里其語言與吉利吉思特異晝長夜短日沒時炙羊肋熟東方已曙矣卽唐史所載骨利幹國也烏斯亦因水爲名

臣秋濤謹案今俄羅斯境有烏斯河在塔爾噶

克山北當卽此水

在吉利吉思東謙河之北其俗每歲

六月上旬刑白馬牛羊灑馬湏成就烏斯水以祭河神謂其始祖所從出也撼合納猶言布囊

蓋口小腹巨地形類此因以爲名在烏斯東謙
河之源出此其境上惟有二山口可出入山水
林樾險阻爲甚野獸多而畜產少貧民無恒產
者皆以樺皮作廬帳以白鹿負其行裝取鹿乳
採松實及劓山丹芍藥等根爲食冬月亦乘木
馬出獵謙州亦以河爲名去大都九千里在吉
利吉思東南謙河西唐麓嶺之北居民數千家
悉蒙古回紇人有工匠數局蓋元初所徙漢人
也地沃衍宜稼夏種秋成不煩耘耔或云克烈

部始居此益蘭者蛇名初州境山中居人見一
巨蛇長數十步從穴中出飲河水腥聞數里因
以名州距京師九千里世祖至元七年遣劉好
禮爲吉利吉思撼合納謙州益蘭州等處斷事
官好禮字敬之汴梁祥符人幼通國語廉訪府
辟爲參議至元五年嘗應詔建言有司奏請宜
先啟皇太子俾得閱習庶政陝西重地宜封皇
子諸王出鎮創築都城宜給直市民地選格不
宜以中統三年爲限後是者不錄帝是其言敕

中書省施行至是遷益蘭州等五部斷事官大修官庫置傳舍以益蘭爲治所先是數部民俗皆以杞柳爲杯皿不知陶冶剝木槽以濟水無舟航之備好禮請工匠於朝爲鑄金範土篙槳之具以教其民民咸便之或言權鹽酒可以佐經費好禮曰朝廷設官要荒務以綏遠寧欲奪其利邪言者慙服會北方諸王叛好禮被執留軍中幾死幸以其善應對得釋十六年春叛王召好禮至欠欠州

臣秋濤謹案卽謙州

曰皇帝疑我致有

今日好禮曰不疑果疑王召王至京師何還之
邪次年春好禮率衆走別部守阨以待兵至遇
叛軍追之西踰雪峩嶺好禮自度踰是則無望
生還遂以衣賂其下始獲東出鐵壁山口間道
南走中道糧絕捕獵以爲食七月至菊海臣秋
濤謹
案菊海卽白哈兒湖俄羅
斯東境湖泊之最大者始與戍兵接得乘傳

至昌州入見以吉利吉思風俗事宜來上帝賜
之食與鈔累官禮部尙書奏言象力最巨上往
返兩都乘輿多象駕萬一有失從者雖衆力何

能及未幾象果驚幾傷從者官至北京路總管
初海都旣叛昔里吉土哇諸王悉起兵相犄角
漠北民避亂而南者七十餘萬吉利吉思諸地
民亦南徙世祖遷之肇州命劉哈刺拔都魯治
之劉哈刺拔都魯者河東人家世業醫至元八
年世祖駐蹕白海以近臣言得召見世祖謂其
目有火光異之遂留侍左右初賜名哈刺幹脫
赤十七年擢太醫院管勾昔里吉叛宗王別里
鐵木兒奉命往征帝問曰當行者多避事汝善

醫復習騎射能從行乎曰事君不辭難臣不行
將何爲卽請授甲帝曰汝安用甲曰臣願備一
戰士帝曰醫汝事也甲不可得惟賜以環刀弓
矢等物馳至王所及將戰從王請甲王曰上不
與汝我何敢與因留之使領輜重慨然曰大丈夫
當效命行陣乃守營帳如婦人耶見有甲者
飲以酒高價取之明日披以往王望見其介而
馳使人走問免胄曰我也一人興善萬人可激
我爲萬人激耳中道三遇敵射之皆不中王喜

甚解衣衣之旣擒昔里吉命獻俘行宮帝見其
瘠甚撤御膳羊載以賜旣拜受先懷其美者帝
問故對曰臣始與母訣今歸母幸存請以遺之
帝嘉其志命自今凡賜之食必先賜厥母以功
授和林等處宣慰副使二十五年海都犯邊尙
書省奏以怯伯往掌和林屯糧帝曰出納非怯
伯所知哈剌斡脫赤可勝任遂使怯伯與俱會
海都兵至使來報與怯伯南行六日止八兒不
刺地距敵軍五六十里怯伯大懼曰事急矣不

如順之劉哈刺見其有二心遂潛遁入見帝

喜曰人言汝陷賊乃能來耶命與酒饌二十七

年遷河東山西道宣慰使奏臣累戰而歸衣裘

盡敝河東臣鄉也乞賜錦衣爲榮帝以金織文

衣賜之居二年召還諭曰自此而北乃顏故地

曰阿巴刺忽者素產魚吾今立城而以兀連臣秋

濤謹案兀連當作兀速蓋兀速卽烏斯而速又誤爲連也憇哈納思乞里吉

里三部人居之臣秋濤謹案此卽烏斯憇哈納吉利吉思之異文也名其

城曰肇州汝往爲宣慰使仍別賜汝名曰小龍

兒或曰哈刺拔都魯汝可自擇對曰龍非臣下
所敢承帝曰然則哈刺拔都魯可也復賜以繡
衣玉帶既至定市里安民居一日得魚九尾皆
千斤遣使來獻俄召還及世祖殂太傅伯顏奉
皇太后命曰東方汝嘗鎮之今以屬汝勿俟制
命乃以爲咸平宣慰使成宗元貞元年召爲御
史中丞行至懿州道卒

報達傳

臣秋濤謹案報達北境
今屬俄羅斯故列於此

報達國卽唐波斯國也按唐書云波斯國在京

師西一萬五千三百里東與吐火羅康國接北

鄰突厥之可薩部

臣秋濤謹案可薩部卽今俄羅斯之端戈薩斯部其種人

曰可沙至今猶然

西北拒拂菻正西及南俱臨大海戶

數十萬其王居有二城復有大城十餘猶中國

之離宮王冠金花冠坐獅子牀服錦袍加以璫

珞俗事天地日月水火諸神西域諸胡事火祆

者皆詣波斯受法焉

臣秋濤謹案今俄羅斯是爾魯部有火田波斯之敬

火者胥來朝拜其地舊屬波斯今歸俄羅斯轄

其事神以麝香和蘇塗

鬚點額及於耳鼻用以爲敬拜必交股文字同

於諸胡男女皆徒跣丈夫剪髮戴白皮帽衣不
開襟并有巾帔多用蘇方青白色爲之兩邊緣
以織成錦婦人亦巾帔裙衫辨髮垂後飾以金
銀其國乘象而戰每一象戰士百人有敗衄者
則盡殺之國人生女年十歲已上有姿貌者其
王收而養之以賞有功之臣俗右尊而左卑以
六月一日爲歲首氣候暑熱土地寬平知耕種
多畜牧有鳥形如橐駝飛不能高食草及肉亦
能噉犬攫羊土人極以爲患又多白馬駿犬所

謂波斯犬也出驥及大驢獅子白象珊瑚樹高二二尺琥珀車渠瑪瑙火珠玻璃琉璃無食子香附子訶黎勒胡椒華撥石蜜千年棗甘露桃隋大業末西突厥葉護可汗頻擊破其國波斯王庫薩和爲西突厥所殺其子施利立葉護因分其部帥監統其國波斯境臣於葉護及葉護可汗死其所令監統者因自擅於波斯不復役屬於西突厥施利立一年卒乃立庫薩和之女爲王突厥又殺之施利之子單羯方奔拂菻於

是國人迎而立之是爲尹恒支在位二年而卒
兄子伊嗣侯立遣使於唐獻一獸名活猓蛇形
類鼠而色青身長八九寸能入穴取鼠伊嗣侯
懦弱爲大首領所逐遂奔吐火羅未至亦爲大
食兵所殺其子名卑路斯又投吐火羅葉護獲
免龍朔元年卑路斯奏言頻被大食侵擾請兵
救援詔遣隴州南由縣令王名遠充使西域分
置州縣因列其地疾陵城爲波斯都督府授卑
路斯爲都督是後數遣使貢獻咸亨中卑路斯

自來入朝高宗甚加恩賜拜右武衛將軍儀鳳
三年令吏部侍郎裴行儉將兵冊送卑路斯爲
波斯王行儉以其路遠至安西碎葉而還卑路
斯獨返不得入其國漸爲大食所侵客於吐火
羅國二十餘年有部落數千人後漸離散至景
龍二年又來入朝拜爲左威衛將軍無何病卒
無嗣而部眾猶存自開元十年至天寶六載凡
十遣使來朝并獻方物四月遣使獻瑪瑙牀九
載四月獻火毛繡舞筵長毛繡舞筵無孔真珠

乾元元年波斯與大食同寇廣州劫倉庫焚廬舍浮海而去大厯六年遣使來朝獻真珠等蒙古憲宗時遣諸王旭烈兀西征丁巳歲取報達國卽波斯西戎大國也地方八千里其王曰哈里發其城有東西城中有大河西城無壁壘東城固之以甃旭烈兀師至城下一交戰破其兵四十餘萬哈里發以舸走獲焉其國俗富庶爲西域冠宮殿皆用沉檀烏木降真爲之壁皆砌以黑白玉金寶珍珠不可勝記所產大珠曰太

歲彈蘭石瑟瑟金剛鑽之類帶有直千金者其
國六百餘年傳四十主至是而亡人物頗秀於
諸國所產馬名脫必察琵琶有七十二絃者

朔方備乘卷三十三

知縣林穗初校
知縣吳壽坤覆校

朔方備乘卷第三十四

傳四

元代北徼諸王傳敘

朮赤

拔都

旭烈兀

撥綽

合丹

海都

土哇

脫忽

那木罕

臣秋濤謹案北徼俄羅斯地元代全入版圖關土旣遠必資親藩以鎮撫之是故朮赤諸王撻伐於前拔都諸王紹封於後固與三代封建之

意遙相符合也然其東西偏相距萬里畛域旣分治忽亦異大要視諸王賢否而已在太祖時用兵於俄羅斯之東偏最先皆由漠北進兵蓋東偏與漠北地相聯也其後乃用兵於俄羅斯之西偏皆由西域進兵蓋西偏與西域壤相接也二役之興元祖長子朮赤皆有勞焉故遂以俄羅斯西偏封朮赤旌伐酬庸典至渥已然西偏諸部之地甚廣非一戎衣所能遽平故太宗之世復命朮赤之子拔都等征斡羅思而定宗

憲宗皆在軍中至憲宗之世復命旭烈兀征西域其兵鋒亦至兀林兀林卽斡羅思蓋其餘黨猶有未服者積三世之力窮追遠討始克平定可謂難矣然旣平之後諸王各安封域朝貢不絕是西偏之事勢先難而後易有如此者若東偏則自太祖之世戈麾所指悉就疆索未嘗再煩軍旅於是太宗分封諸王海都土哇等並設斷事官以莅謙州益蘭州等處且以吉利吉思等路隸嶺北行省蓋以其地附近和林思富庶

其民以固根本乃無何而海都諸王相繼弄兵
鎮戍征討垂五十載是東偏之事勢先易而後
難有如此者合而論之亦有元一代得失之林
也元史諸王列傳本極簡略臣蒐采史事補其
闕失爲朮赤以下諸王傳一卷雖不敢謂無所
遺漏然於元代北徼之事足資省覽亦講邊務
者所不廢已

元諸王朮赤傳

朮赤今改卓齊特亦作卓
沁

朮赤亦作拙赤太祖長子也太祖始起於幹難

河卽今之敖嫩河黑龍江上源也乙丑年太祖
命朮赤領右手軍往征林木中百姓以不哈爲
嚮導有幹亦剌部之忽都哈別乞先來歸附遂
引朮赤往征萬幹亦剌部入至失黑失惕於是
幹亦剌及禿巴思諸種人皆降至萬乞兒吉思
部卽吉利吉思也其酋長也廸亦納勒等皆來
歸附以白海青白驕馬黑貂爲獻朮赤更北略
地自失必兒種以南林木中百姓悉收捕之按
林木中百姓卽今所稱樹中人沿敖嫩河以東

自尼布楚城以北烏梁海布特哈捕貂諸部皆是今其地屬俄羅斯轄朮赤師旋太祖以忽都哈別乞先來歸附以皇女扯扯亦堅公主妻其次子亦納勒赤又以朮赤之女豁雷罕妻其長子時汪古部長亦降太祖亦妻以女後太祖定以第三子窩闊台爲嗣使朮赤率師征討各國戊寅年吐麻部叛太祖徵兵乞兒部乞兒部不從亦叛去遂命朮赤往討之以不花爲前鋒追乞兒部至亦馬兒河而還朮赤率師順謙河水

北行遂招降克兒爲思部撼哈思帖良部兀克
失部的迷火因部亦而干部於是元斥境至北
海矣乞兒爲思卽吉利吉思撼哈思帖良卽撼
哈納兀克失卽烏斯餘二部蓋卽謙州益蘭州
地也已卯年太祖征西城朮赤從往庚辰年攻
斡脫羅兒城克之卽斡羅思也辛巳年朮赤攻
克養吉干八兒眞等城後太祖命朮赤及察阿
岱窩闊台同領右手軍過阿梅河至兀龍格赤
城駐營命朮赤等皆聽窩闊台調遣太祖復命

速不合征西域迤北康鄰乞卜察等十一部落
康鄰卽俄羅斯北境之康里乞卜察卽俄羅斯
北境之欽察也渡亦的勒水札牙黑水直至乞
瓦綿客兒綿等城此皆今俄羅斯西境地太祖
遂以幹羅思阿速欽察諸地封朮赤爲汗其地
極遠去京師數萬里驛騎急行二百餘日方達
京師朮赤旋薨子拔都嗣別有傳拔都薨弟撒
里答嗣撒里答薨弟忙哥帖木兒嗣忙哥帖木
兒薨弟脫脫忙哥嗣脫脫忙哥薨弟脫脫嗣至

大二年封脫脫爲寧肅王賜金印脫脫薨弟伯忽嗣至元七年命伯忽爲札魯忽赤之長伯忽薨弟月卽別嗣一作月祖伯自後部落遂以月祖伯爲號云至大元年月祖伯薨子扎尼別嗣及順帝北走扎尼別之子孫仍世王俄羅斯如故旣而俄羅斯西北境諾戈落部有土人依番者崛起自爲國尤赤之後始式微云

元諸王拔都傳

拔都今改巴都

拔都亦作幹魯朶拔都亦作拔都蒙哥鐵木亦

作八都罕亦作巴禿朮赤子太祖長孫也太祖

時卽封右手大王留鎮北邊朮赤薨拔都嗣凡

俄羅斯諸部地悉歸統轄太宗七年命拔都及

皇子貴由

卽定宗

皇姪蒙哥

卽憲宗

征西域九年春

蒙哥征欽察破之欽察部去中國三萬里夏夜

極短日斃沒卽出俗勇猛青目赤髮

臣秋濤謹案今俄羅斯

斯人多綠瞳卽所謂青目也多紅毛卽所謂赤髮也

蒙哥率師攻破之其

渠長八赤蠻逃入寬田吉思海島蒙哥亟進師

至寬田吉思海會大風刮海水淺可渡蒙哥喜

日此天開我道也遂入海島擒之八赤蠻曰吾之逃入於海與魚何異然終被擒天也今水還期將至汝師亦宜早旋蒙哥聞之遽班師前軍甫渡而水至後軍有浮渡者按寬田吉思海論者或疑卽伊犁河所匯之巴勒喀什泊今驗巴勒喀什泊中雖有山島然道里太近不足當寬田吉思海之目西北邊淖爾中有島者非一塔爾巴哈台之西有巴爾喀錫淖爾在巴勒喀什之正北巴爾喀錫之東北千餘里有慈謨斯夸

淖爾慈謨斯夸之西北九千里有額納噶淖爾
其中皆有島速不台傳云討欽察引兵繞寬定
吉思海展轉至太和嶺元之太和嶺有二此爲
欽察境之太和嶺或云卽烏拉嶺也欽察夏日
晝極長夜極短當爲俄羅斯極北近北海處地
理志西北地附錄欽察屬月祖伯分地月祖伯
卽月卽別朮赤裔孫也朮赤封地極遠驛騎急
行二百餘日方達京師以道里計之惟額納噶
泊可以當寬田吉思海今俄羅斯人所稱阿尼

牙湖是也其水通波羅的海所謂大風刮水淺而可涉旋復水至疑卽海之潮汐偶爾愆期如元師入臨安錢塘潮三日不至事正相類史家不言爲潮蓋因憲宗潛邸之事故示神奇耳蒙哥旣克欽察進圍幹羅思部至野烈贊城蒙哥躬自搏戰破之幹羅思今改作俄羅斯野烈贊今改作額里齊或云卽額里齊斯河旁地也又征蔑怯思部穩兒部別里部皆降初貴由征阿速境有功阿速卽今俄羅斯南境阿索富城也

其西有部落曰計由斯科或作幾富亦稱究部
爲俄羅斯最膏腴地按北人質樸多以人名名
其地計由與貴由音近疑卽貴由所克取以已
名名之相沿至今也至十二年貴由克西域未
下諸部遣使奏捷詔班師十三年太宗復命拔
都等討兀魯思部主也烈班爲其所敗圍禿里
思哥城臣秋濤謹按思哥卽斯科也此斯科名見於史之始不克拔都等
奏遣速不台督戰速不台選哈必赤軍怯憐口
等五十人赴之一戰獲也烈班進攻禿里思哥

城三日克之盡取兀魯思所部而還兀魯思卽
斡羅思也蓋拔都封地在俄羅斯故附近各部
軍務皆得統之速不台嘗率師圍汴滅金有大
功至是遂從拔都行軍又克馬札兒部至禿納
河太宗殂諸王大會拔都欲不往速不台諫乃
往會於也只里河奉貴由卽位是爲定宗速不
台西還家於禿納河上而卒先是蒙哥幼太宗
以速不台之子兀良合台世爲功臣家使護育
於潛邸分掌宿衛及蒙哥偕拔都征欽察兀魯

思阿孛烈兒諸部兀良合台從征皆有功又從
討平孛烈兒乃捏迷思諸部定宗殂後皇后稱
制三歲無君拔都及兀良合台等咸會詔所立
拔都首先推戴蒙哥兀良合台亦曰蒙哥聰明
睿智人所共知拔都之言良是議遂定蒙哥卽
位於幹難河是爲憲宗三年春拔都乞買珠銀
萬錠帝與以千錠曰此財本太祖太宗所遺若
一過費將來何以給諸王之賜已宜務節儉此
銀卽充歲賜之數拔都旋薨餘事詳元史傳

元諸王旭烈兀傳

旭烈兀今改轄魯

旭烈兀亦作旭烈亦作吁里兀亦作煦烈拖雷
第六子太祖諸孫憲宗世祖之弟也憲宗二年
秋七月命諸王旭烈兀征西域素丹諸國按西
域回部稱其君曰斯丹卽素丹也亦作斯單亦
作斯坦亦作斯當亦作算端亦作算灘亦作速
擅今西域痕都斯坦諸國尙襲舊名卽哈薩克
有蘇爾統之稱亦斯丹之轉音哈薩克本回部
也旭烈兀之西征也拓境幾萬里所平凡十餘

國壬子年自和林西行至阿母河卽西遼河中

府舊地也自此而西伐木刺奚國

臣秋濤謹案卽木乃今國

今之布哈爾國地下一百二十八城又西伐乞都卜國

又西取兀里兒城又西破阿刺汀國又西破乞

石迷國

臣秋濤謹案卽克什米爾

又西滅報達國

臣秋濤謹案卽波斯

國拔三百餘城又西三千里至天房國降之

臣秋

濤謹案卽天方國

下一百八十五城又西降密昔兒國

又西渡海取富浪國

臣秋濤謹案卽古拂菻國又案至此已極西海下文

諸國當在富浪之東蓋轉而東行也

又降石羅子國又取賓鐵國

又西北取兀林國

臣秋濤謹案兀林當卽兀魯亦曰兀魯思卽今俄羅斯也

案俄羅斯國元人前已取其地此當是其南境未服者

得城一百二十四

又南取乞里灣國

臣秋濤謹案疑卽俄羅斯南境之是爾灣部

旭烈

兀與大將兀良合台等會兵轉戰萬里所向無

敵又與拔都等五道進兵克馬扎兒部遂留鎮

西域建庭於忽里模子之地憲宗殂於釣魚山

世祖北還旭烈兀自西域遣使勸進丁巳年分

食邑彰德路二萬五千五十六戶旭烈兀旋薨

子阿八哈嗣亦稱阿不哈至元八年朝廷遣使

徵礮匠以亦思馬因及木發里人阿老瓦丁應
詔十五年詔遣札木合等持金十萬兩命阿八
哈市藥師子國阿八哈薨子阿魯嗣阿魯薨子
合贊嗣大德八年遣使貢珍物延祐六年薨子
不賽因嗣自泰定元年以後朝貢無虛歲後卽
以不賽因名其部云按旭烈兀所都忽里模子
爲西域之極西境距中國絕遠自泉州入海十
萬里至馬八兒國馬八兒國水程得便風十五
日至阿不哈大王城其陸路則由篤來帖木兒

月祖伯兩部以達上都篤來帖木兒封於于闐
卽今西域和闐由嘉峪關朝貢之路月祖伯封
於俄羅斯卽今俄羅斯南通波斯土耳其之路
也亦可見旭烈兀建庭地與俄羅斯相近矣

元諸王撥綽傳

撥綽拖雷第八子太祖諸孫也憲宗卽位撥綽
以諸王奉命率師北征欽察部有功賜號拔都
丁巳歲分食邑蠡州三千三百四十七戶撥綽
薨子薛必烈傑兒嗣薛必烈傑兒薨子牙忽都

嗣至元十二年從北安王北征十八年加封來陽州五千三百四十七戶二十七年封鎮遠王賜塗金銀印大德十一年進封楚王賜金印牙忽都薨子脫列帖木兒嗣

元諸王合丹傳

臣秋濤謹案元諸王同時有二哈丹其一爲合赤溫

之孫至元十二年從乃顏叛誅非此也

合丹亦作哈丹太宗第六子也太宗時與諸王拔都等五道進兵攻附近俄羅斯之馬扎兒部憲宗二年憲宗以諸王欲立失烈門者多後言

乃遷合丹於別失八里地卽今喀刺沙爾也遷
蔑里於葉兒的石河卽今額爾齊斯河也遷海
都於海押立地在今俄羅斯金山以北遷別兒
哥於曲兒只地遷脫脫於葉密立地皆在今伊
犁以北遷蒙哥都及太宗之皇后乞里吉忽帖
尼於擴端所居之西禁錮失烈門於沒脫赤之
地六年還合丹於舊居近亦集乃之地中統元
年世祖卽位合丹有推戴功丁巳年分食邑汴
梁在城戶至元三年改撥鄭州十八年撥江南

鈔常甯州二千五百戶合丹薨子都爾赤嗣

元諸王海都傳

海都合失子太宗諸孫合失早死海都嗣封憲宗之世忌諸王修怨於太宗遷蒙哥都脫脫合丹蔑里等於遠亦遷海都於金山北之海押立以是諸王咸怨有二心憲宗六年令諸王還所部遣斷事官石天麟使海都海都拘留不遣海都所封地在金山以北爲今俄羅斯東境錫伯利部地東距昂噶拉河西距額爾齊斯河北抵

北海海都恃其險遠有跋扈志世祖卽位以合
丹有勸進功推恩太宗諸王加賜金帛海都與
焉至元元年西北諸王率所部來歸而憲宗諸
王以阿里不哥構亂不自安河平王昔里吉煽
惑諸王海都遂掠畏兀兒虜其民十一年追海
都所給金銀符朝議欲用兵世祖曰宗室也惟
當懷之以德命平陽馬步站達魯花赤鐵連往
覘之至則海都與之宴酒半鐵連求衣爲歡海
都將解衣其妃止之畀皮衣二襲歸白世祖曰

海都兵繁而銳不宜速戰來則堅壘去則勿追
世祖然其計十二年皇子北平王那木罕右丞
相安童與牙忽都備邊於阿力麻里八魯渾拔
都兒粘闐與海都通牙忽都擒之昔里吉遂誘
諸王叛從之者曰脫鐵木兒曰要木忽兒曰撒
里蠻曰扎刺忽曰火魯火孫曰禾忽曰忽魯帶
曰兀魯思不花曰乃蠻帶曰幹羅思曰失班曰
也孫禿阿曰捏坤曰忽都答兒曰禿滿曰阿魯
灰曰禿曲滅曰禿魯干曰闊闊帶曰哈丹又有

從哈丹者曰阿禿曰訥答兒曰聶怯來曰朶列
禿曰八里帶曰斡里羅忽里帶從阿禿者曰朶
羅帶曰脫迭出曰抄兒赤曰合麥安童攻禾忽
獲其輜重諸叛王報之合兵攻北平王擒牙忽
都世祖命宗正府札魯花赤昔班諭海都罷兵
海都以釁由安童不從十四年七月昔里吉劫
北平王械繫安童以入海都掠憲宗所御大帳
世祖始決意用兵詔宗王別里鐵穆兒右丞相
伯顏帥師忽魯帶來歸與伯顏軍合擊之於斡

兒罕河牙忽都逃歸西域于闐王阿魯忽亦叛
應海都十九年撒里蠻悔過執昔里吉來歸乃
蠻帶亦降二十一年牙忽都與土土哈得海都
謀人知其虛實衝其精兵海都敗走得所俘掠
軍民迎北平王安童與石天麟還是時乃顏反
遼東海都伺其隙二十五年六月海都遣將暗
伯著暖犯業里干淖爾冬又數犯邊拔都也孫
脫死之於是成宗鎮金山前衛親軍都指使玉
哇失從甯遠王闊闊出丞相朶兒朶懷擊海都

軍復擊其將八憐八憐敗海都復使禿苦馬領
精卒三萬據撒剌思河以拒玉哇失率善射三
百人却之二十六年六月海都兵至和林宣慰
司怯伯同知乃滿帶副使八里鐵兒皆叛應海
都北鄙大震七月世祖親征皇孫晉王抵抗海
戰不利車駕歸明年海都又入寇官軍不戰而
潰二十九年諸王明里帖木兒叛從海都伯顏
敗之於阿撒忽禿嶺會有譖伯顏與海都通者
御史大夫玉昔帖木兒代之未上而海都又至

伯顏欲誘之深入且戰且行七日衆不可海都
遂脫去是年秋土土哈略地金山獲海都之戶
三千餘詔土土哈進取乞里吉思三十年春王
師次謙河海都引兵至虜都阿思之民元貞初
海都犯西番界大德元年土土哈之子牀兀兒
北征踰金山至答魯忽河敗其將帖良古追奔
五十里還次阿雷河與海都援師孛伯遇孛伯
陣河上高山牀兀兒渡河擊敗之追奔三十餘
里五年海都與土哇大入八月朔戰於鐵堅古

山越二日海都悉衆來大戰於合刺合塔王師
失利明日復戰官軍分爲五爲海都所乘襲加
台以勇敢千人衝之乃退其明年海都又犯邊
不得志去旋死諸叛王多先後降土哇亦內附
海都子察八兒因請和十一月遣諸王滅怯禿
玉龍鐵木而使於察八兒八年察八兒使至賜
幣六百匹九年又與土哇遣使至賜銀千四百
兩鈔七千八百餘定自海都創亂其民七十餘
萬散居雲朔間北邊不靖者垂五十年至大三

年尙書省言昔世祖有旨以叛王海都分地五
戶絲爲幣帛俟彼來降賜之藏二十餘年今其
子察八兒向慕德化歸覲闕廷請以賜之帝曰
世祖謀慮深遠若是待諸王朝會頒賞旣畢卿
等備述其故然後與之使彼知愧六月壬申察
八兒來朝詔設宴大庭諸王大臣被宴服就列
康里脫脫卽席陳西北諸藩始終離合之由去
逆效順之義且告祀太廟延祐二年封察八兒
爲汝甯王置王傅官察八兒薨子完者帖木兒

嗣完者帖木兒薨子忽刺台泰定元年嗣汝甯王泰定帝殂爲其太子起兵拒文宗兵敗走不知所終

元諸王土哇傳

土哇今改都幹

土哇亦作篤娃拙赤孫拔都子太祖嫡長曾孫也不得立居恆怏怏而拔都乃心王室故至元之初土哇叛跡未露旣嗣位以所分地居金山南據要害海都地在金山北土哇與接壤金山今謂之阿勒坦山自額爾齊斯河南岸繞而北

直抵俄羅斯境西接烏拉嶺皆金山也土哇陰
通海都與諸王相攻至元十二年土哇與卜思
巴等率兵十二萬圍火州火州亦都護所治也
土哇使說亦都護降且聲言曰阿只吉奧魯只
諸王以三十萬衆猶不能抗我而自潰爾敢以
孤城當吾鋒乎亦都護不從受圍凡六月不解
土哇以書繫矢射城中曰我亦太祖諸孫何以
不附我爾祖嘗尙公主爾能以女與我則休兵
不然急攻爾亦都護恐以其女也立亦里迷失

別吉厚載以茵縫城下乃解去二十三年秋土
哇與海都同侵別失八里虜屯田管軍總管李
進時宣慰司綦公直從伯顏進戰於洪水山公
直子瑗戰死公直與妻俱陷二十五年九月土
哇又犯邊海都連年大入土哇與相爲表裏大
德二年牀兀兒攻海都八憐土哇與徹徹禿等
潛師襲火兒哈禿阻山爲營牀兀兒選勇而善
步者持挺及四面上奮擊覆其軍五年土哇又
與海都南侵武宗與戰於鐵堅古山王師爲海

都所乘土哇復與大軍相持於兀兒禿牀兀兒
與玉哇失以精銳馳其陣阿失射土哇中其膝
號而遁而海都又死土哇失所倚乃與察八兒
明里帖木兒謀曰我太祖艱難成帝業我子孫
弗克靖恭連年搆兵以相殘殺是自隳祖宗之
業也不若請命罷兵休息吾民七年請內附月
赤察兒方副武宗撫軍言於武宗曰土哇請降
爲我大利固當待命於上然往返再閱月必失
事機土哇之妻我弟馬兀合刺之妹也宜遣之

往許其成八年九月土哇與察八兒同遣使降
皆賜幣九年二月賜土哇使者幣五百匹四月
又賜使者銀鈔十月駙馬按簪不花自土哇所
歸朝賜銀鈔其時定制諸王駙馬之使者支鋪
馬有程期過限不再給是年陝西行省言於朝
曰諸王駙馬多邊藩鎮戍其所遣乃爲軍需纔
過程期卽不祇應使其人市食步趨非所宜也
今迤北土哇等遣使入覲驛騎往來儻揚聞於
外誠非國家柔遠人懷萬邦之良規朝廷遽之

爲改制十年九月土哇遣其子寬閣來賀聖誕
節次年卒土哇故偃蹇終其身未肯入朝至大
元年寬閣嗣月赤察兒旣破禿曲滅遣使奏曰
禿曲滅分地金山本懷攜貳而察八兒遊兵近
境儻合謀致死則垂成之功不就且長爲國患
臣以爲昔者土哇先衆請和雖死宜安撫寬閣
使不我異乃賜寬閣金銀鈔七月遣塔察兒九
人往使九月又使焉且以薛迷思干等城二年
賦與之禿曲滅果欲奔寬閣不見納亦來降

元諸王脫忽傳

脫忽蔑里子也蔑里爲憲宗所遷居於葉兒的石河葉兒的石河卽今之額爾齊斯河其水發源科布多之西瀦爲宰桑泊又北入俄羅斯境行七千餘里注北海元太祖自西域班師於葉兒的石河過夏次年乃歸土拉河地在金山之北今杜爾伯特舊游牧處在額爾齊斯下游宰桑泊之北濱湖地腴宜耕牧當是元祖過夏處蔑里所遷則更在其北屬今俄羅斯境脫忽旣

嗣爵意不自得昔里吉之劫北平王也脫忽與知之至元十四年宗王別里鐵穆兒征昔里吉師次金山有使者云自脫忽王所來曰我受分地守之不敢失凡上所使與昔里吉之過我者吾皆飲食之今聞王來甚喜一見可乎王以爲信左右曰詐也脫忽所居地險殆與昔里吉爲耳目乃羈其人遣兵從間道窺之獲游騎三十得其情知脫忽方酣飲進擊之獲昔里吉所遣使脫忽因太宗孫嘗藏太宗玉璽傳至孫禿滿

獻之封陽翟王族有察阿台者嗣王居故地延祐三年武宗長子和世琜爲丞相鐵木迭兒等所間不得立以周王出鎮雲南行次延安西行至金山察阿台聞之率衆迎周王至其部與定約束每歲冬居扎顏夏居幹羅幹察山春則耕於野泥十餘年歲戊辰七月泰定帝殂僉樞密院事燕帖木兒謀舉義立周王爲帝是爲明宗十月明宗發北邊察阿台與沿邊元帥朶列捏萬戶買驢等帥師扈行踰金山明年正月明宗

卽位和林北帝謂中書左丞躍里帖木兒曰朕
至上都宗藩皆會諸王察阿台從朕遠來有司
供張皆宜豫備其與臣僚議之八月次王忽察
都明宗遇弒至正元年錄扈從明宗諸王官屬
功凡八百七人賜金銀鈔幣有差

元諸王那木罕傳

那木罕今改諾摩罕

那木罕亦作那沒罕亦作南木合世祖第四子
至元二年封北平王命丞相安童輔之建幕府
於和林北阿力麻里之地在北庭西北四五千

里十四年七月河平王昔里吉叛執那木罕昔
里吉者憲宗第四子也至元五年封亦居阿力
麻里賜駝紐金印魏源曰其封地在海都之西
金山之北東至額爾齊斯河西至烏拉嶺今俄
羅斯國都莫斯科地也當世祖時海都方跋扈昔
里吉潛與脫脫木兒藥木忽兒等謀劫那木罕
以叛械繫丞相安童使通好於海都遂率兵至
和林城北帝命伯顏將兵拒之過於幹魯歡河
夾水而陣相持彌日伺其懈掩擊破之十九年

昔里吉爲諸王撒里蠻所執那木罕始得歸改
封北安王仍鎮北邊二十一年還朝賜鈔一萬
二百四十六錠重給金印與之大德五年薨延
祐七年賜諡昭定昔里吉被執後爲漢軍都元
帥李庭所襲擒啟皇子只必帖木兒誅之李庭
復引兵會諸王納里忽渡塔迷兒河殲其餘黨
河西悉平塔迷兒河卽塔米爾河在烏里雅蘇
台之東會鄂爾坤以入色楞格者也詳攷地勢
知那木罕所鎮之阿力麻里實在北而不在西

西域水道記以伊犁之阿里瑪圖當之其說固未確已

朔方備乘卷三十四

知縣吳壽坤初校
知縣成明郁覆校

